

## Kerweredd 2022

Ihr liewe Leit woas bin isch froh,  
„Die rämschter Kerb is wirrer do!“

Koa Pandemie, koa Traaser orrer andere Dinge  
konnde uns je in die Knie neu zwingen.

Mir hewwe halt moal e bissje paussierd,  
uns inhaltlich und personell ach nei strukturierd

um mid neuer Krafd un Elan heit wirrer do zu steh,  
jetzd soagd emol sellwer, is des net schee?

Un fer all die heit middoach gekumme sinn doher an die Blaasch,  
singe mer als Formtschegg gemeinsam mol de Rämschter  
Kerwemarsch.

- Herr Kapellmeister → Sascha -

De JP hoad geheierd, vielleicht habt ers vernumme  
un hoad de Zylinder als Kerwevadder vum Kopp genumme.

Vun moine Borsche wurd ich zum neije Kerbvadder benannt  
Un isch hoff, isch bin do unne aach jedem bekannd.

Fer all die, die misch werglisch net kenne,  
will isch emol schnell e poar Eckdate vun mir nenne.

Florian Göbel, 24 Joahr oald un Metzjeramoasder in vierter  
Generation,

vun Ufftridde ande Fastnoachd kennd ehr misch vielleischd schon.  
Bei de Rämischer Feierwehr du isch misch aach engaschiern  
un seid diesjoahr hald aach die Rämischer Kerweborsch fiehrn.

Fer genauere Details wie Schuhgreeß un so,  
freegd ehr am besde moi Eldern, do driwwer, wer isch froh.

Traditionell in de Kerbredd du isch eisch berichde,  
wass es gidd aussem Rathaus fer neije Geschichde.

De Willi aus Beerwisch dud do immer noch regieren,  
der Ortsvorsteher aus Ramscht sich bei Social Media stark  
engagiern

un die Verwaltung hod sich iwwer zwoa Joahr Pandemie do  
driwwe oigeschlosse,

isch soach mol die hewwe die Ruh mol rischdisch genosse.

Es foahrn uff de Aldi Autobahn hod es Gerischt oi kassierd

un en Fuchs hod uffen Landratsamt an de Deer randalierd.

Doch es schendsde is, un des is werglich ned zum Lache,

die Spezialagende vun do driwwe krieje es net hie uffem Friedhof  
e neij Urne woand zu mache.

Un isch waas aach ned was in de letzde zwaa Joahr is do driwwe  
passierd,

weil oaner nochem annere vun de Oagestellde soin Diensd  
quittierd.

Mer herd es nur mungele aus interne Kreise,

de Willi will soi Oagestellde mit Äbbel un Beern als Entlohung  
abspeise.

Des solls jetzd ewwer geweese soi mid polidische Rathaus  
geschischde

obwohl, isch kennd noch stunnelang weider berischde,

ewwer im Ord is joa aach noch es oane orrer oannere bassierd  
un des heb isch mir nadierlich aach uffnodierd.

Kerwebosch soi is ned goanz so kompliziert,  
wann mer sisch mid e poar bestimmte Regele arrangschieerd.

An de Kerb solld mer do soi des is goanz kloar,  
aach an de oannern Umziesch verdaahlt uffs Joahr.

Es roto Polo solld immer gewesche dehoam im Schrangk drin  
hänge  
un aach e poar Lieder solld mehr singe kenne.

Alles in allem hoad des was zu du mit Tradition,  
moi Borsche do unne die kenne die schon.

Un oa Tradition is, ihr kennds eisch schun denge,  
des mer Dunnersdoags vor de Kerb an de Kneibe Kerbkränz  
uffhänge.

Aach letzd joahr trotz Corona wollde mer die Tradition ned sause  
lasse  
un sin gezoe dorsch die Rämschter Gasse.

Vun de Wert gidde doann woas zu esse un zu dringe  
un meehr dunn die neisde Kerwehits singe.

Hänge de Kerbkroanz uff, so wie ihr des kennd  
un ziehe doann weider zum negsde Etablissmend.

Als die erste Kneibe un Hööf wurden erfolgreich genumme,  
is mer an der Kneib Ecke Bahnhof un Staastroß oagekumme.

Do is es Kranz hänge e kloa bissje kombliezied,  
denn woas zum hiehänge is ziemlich weid owwe plazierd.

De Benni wurde zum uffhänge vum Kranz vunde oannern  
bennand,  
nur e Laader woar hald ned zur Hand.

So wurd de Uffhängplan kurzerhand umstrukturiert  
un de Benni uff zwaa Schuldern vun oannere Borsche plazierd.

So gings owwenaus in lufdische Heh,  
de Benni fand ned werglich schee.

Un weil er owwe weje ner Windböe is ins ins schwange gekumme,  
hod er e Außelamp zum stabilisiere un festhoale genumme.

Die Idee woar ned gut sondern eher beschisse,  
so hoad er die Lamp aus de Verangerung raus gerisse.

Un so hing die Lamp doann ziemlich dumm,  
nur noch am Kabel an de Wand herum.

Mer is nadierlich ned oafach fort gerannt  
sondern hod de Schade em Wert gennand.

Die Schadensbehebung wolde man wann anners arrangiern,  
denn mer mussd ja zu de negsd Kneib wieder maschiern.

Glei Freidoags is de Benni ins LaCasa marschierd  
un hoad em Wert soi Telefonnummer uffnodierd.

Er würd nadierlich fer de Schaden uffkumme,  
doch de Wert hod em defier koan Euro abgenumme.

Isch hoff er sehd die Sach genauso wie isch,  
beides Ehrenmänner hald un die Sach is vum Disch.

Un die Musigg speelt em Benni: Kerweborsch so in lustige Brüder

---

Zwaa Kerle do aus unserem Ord,  
die mache allsemol minnanner fort.

Die letzde zwaa Joahr woar des ned immer so leischd zu gestalde,  
mer mussd sich joa an die Coronaregeln un Ausgangssperre halde.

Es Zeitfenster woar teilweise korz un es freie Lewe zu genieße,  
un woar es Fenster uff, muss mer nadierlich raus um des zu  
begieße.

An nem Freidaach woar de Zeitpinkt gut un so wurd schnell  
beschlosse,  
um neun werd beim Bernd in de Woistubb getroffe.

Un so is mer doann aach in de Woistubb oigecheggd  
un hodd sich ersdmol mit reichlich Getränke oigedeggd.

Mid werfle un dringe dud die Zeit wie im Flug vergehe,  
doch eigendlich wolld mer aach noch was anneres sehe.

Die Apres Skihütt in Steigerts woar es ausgerufene Ziel,  
doch selbsd foahrn konnd mer ned mehr weil hald getunge zu viel.

E Taxi muss bei, des bringd uns do nuff,  
un do mache mer uffen Steigerts noch schee oaner druff.

Iwwer e Stunn loang wurd mid alle Taxizentrale im Kreis  
telefonierd,  
obs noch oaner gid der unser zwaa Kerle midde in de Noachd noch  
Steigerts kutschierd.

Un oaner hoad sich doann aach bereid erklärd,  
dass er unser Kerle zum feiern nooch Steigerts fährt.

Die freude woar groß, des wird rischdisch geil,  
do owwe gehen se nämlich immer rischdisch steil.

Noach ner halwe Stunn anfardd is mer doann am Talblick  
oagekumme,  
doch ausser Ruhe un Dunkelheid hod mer niggs vernumme.



Meri s doann ungläubisch die Trepp nuff an die Hütte marschierd  
un oan de Oigangsdier woar en weiße Zeddel plazierd.

Un woäß do druff stoand machd unser Kerle ziemlich betroffe:  
„Ihr liewe Leit, hier werd immer nur Samstachs gesoffe.“

Gekniggd un betroffe sin die zwaa wirrer ans Taxi marschierd  
un wurde wirrer zurigg noach Ramscht kutschierd.

In Ramscht blieb es Taxi doann wirrer oande Woistubb stehn,  
des machd jetzd 80 Euro bitteschön.

Die zwaa hewwe bezahld un sinn aussem Taxi raus  
un weil die Woistubb mittlerweile zu had sinn se hald  
halbnüchtern nach Haus.

Ihr zwaa Spitzkligger, duds eisch am beste hinner die Löffel  
schreiwe,

Trinksport koann mer inde Apres Skihütt uffem Steigerts immer  
nur Samsdoachs betreiwe.

Un die Musigg speelt:

---

Es gidd Veranstaltunge do rifft glei alles Hurra,  
Kerweborschausflug in die City vun DA.

Was esse, was tringe un mol noach Mädscher speggulieren,  
die neijsde Dance moves mol ausprobiern,

alles in allem do werstde ned merb  
bei so em kloane Formtschedd fer die Kerb.

Im Shots gings los mid dem ludsische Treiwe,  
do dud mer sich schee e poar korze unner de Noas noi reiwe.

Von do aus werd doann ungenierd  
in de Centralstation oimarschierd.

Do gids doan Longdrinks un Bier un oannere Dinge,  
es Doanzboah du mer a schee schwinge.

Noachts um zwaa reifd doann de Plan,  
mim Bus werd jetzd schließlich hoam gefoahrn.

So is mer doann ans Schloß gelaafe  
um es Heimfahrticket am Automat zu kaafe.

Debei woar aach soen kloane digge,  
ihr werd en schun kenne, Kessel Willi dud merm alsemol nenne.

Der had noch en hunger das er konnt kaum noch stehn  
Deshalb wolld er noch en Döner abdrehn.

So isser doann aach los maschierd  
un hod sich noch en Döner oimassierd.

Doch grad is aach die Stroaßeboahn gekumme,  
die unser Kerle hoad mit genumme.

Userm Fresser konnd des die Laune ned vermieße  
Der wolld erst mol in Ruh soin Döner genieße.

Un dengd goanz entspannd, was wird schun soi,  
stei ich hald in die negsd Stroaßeboahn oi.

Gesagt, getan die negsd Stroaßeboahn is gekumme  
so hod er die 9 Rischdung Böllefalldor genumme.

Am Bölle oagekumme woarn die oannern schun weidergezoe,  
ewwer zum Gligg is grad en O-Bus um die Egg oigeboe.

Do hod sich unsern kloane doann noiplazierd  
un dengt, jetzd wer isch schee hoam kutschierd.

Doch als er hoggd werd er glei vun de Müdischkeit iwwerrennd  
un is schee emol im Heagbus oigepennd.

Was er als negsdes vernimmd is em Busfahrer soin Ton:  
Ober-Ramstadt, Rondell, Endstation.

Er dengd, gud do foahr isch mim Bus hald oafach zurigg,  
ewwer er ernted vum Busfahrer nur en entäuschende Bligg.

Fer misch is jetzd Feierowend, isch derf disch ned mer  
transpordiern,  
ruf der e Taxi orrer du mussd noach Ramscht hald maschiern.

Unsern kloane dengd: Moi korze Haxe beweje sich recht schnell,  
isch laaf iwwer die B426, do bin isch glei dehoam un es is noch  
ned hell.

So is unsern Borsch goanz ungenierd  
iwwer die Umgehungsstroaß Rischdung Bellranscht hoam  
maschierd.

Doch plötzlich fährt e Audo an unserm Borsch vorbei,  
händ vorem o un wer isses, die Zivilpolizei.

Die fand des iwwerhaupt ned doll,  
des oaner uff de Umgehungsstroaß leefd und der is aach noch voll

So hewwe se unser Kerlsche koarzerhand in ihr Zivilstreife  
manövriert  
un hewwen bis vor soi Hausdier in de Owwerschämschder Stroaß  
kutschierd.

Do steid er doann aus un dud sisch freundlich bedoange  
un zielsischer Rischdung Hausdier wange.

Rabbi moin Froind, wenn mer es negsde mol zamme ausrigge,  
musd de uffen Hoamweg ned noch en Döner verdrigge.

Weil do wersd de aach mid uns oagekumme,  
und die Zivilpolizei häd disch ned mitgenumme.

Un die Musigg speelt:

---

Wenn einer eine Reise macht do koann er was erzähle,  
der eine vun em schöne Urlaub, der oanner musd sich quäle.

Fünf Kerle do aus unserm Ort  
die machde dies Joahr minanner fort.

En Hausverwalter, oaner vun Riese un Müller, en Beamte un zwaa  
Polizisde  
ginge gemeinsam uff die Piste.

Palma de Mallorca, Insel du im Wind,  
woar es Ziel wo se hie gefloe sind.

Cala Ratjada in de nordöstlichen Ecke,  
is wo se im Hotel oitschegge.

Um sich zu sunne, zu schwimme un aach zu feiern,  
dann noch e bisje iwwer die Insel zu eiern.

An oam Doach hods de oa vun denne mäschtisch iwwerdriwwe,  
der hod sisch innerlich ordentlich mit San Miguel oigeriwwe.

Doann hod er de goanze Doach schloofend wie e Seekuh in die  
Liesch drin geleje,  
isch hab es Bild vor Aachee, des wolld ihr ned seje.

Owends had jeder die Lage glei erkannt,  
unserm Kerl had en mäschtische Sunnebroand.

Feierwehraudo rot sei Hautfarb jetzd war,  
das des mit Schmerze verbunne is, is ja ganz klar.

Als mer Owends doann wolld esse gehen,  
konnd er vor schmerze kaum noch stehn.

In de Werdschaftd fregd er de Kellner ob er wär mal so ned  
Un vielleischd e nass Handtuch fer en häd.

Um soin Körper oafach mol runner zu kühle,  
in ihm vibrieren nur noch schmerzhaftde Gefühle.

Eine nasse Handtuche segd de Kellner tue de Sonnebrand ned  
vertreiwe,  
du mussd dische mid frische Tomade oireiwe.

Un doann hod, wer hätte es gedachd,  
de Kellner unserm Borsch e Päcksche mit frische Tomade  
gebrachd.

Der is doann hoam, des is ned iwwertriwwe  
un hod soin goanze Körper schee mit de Tomade oigeriwwe.

Obs woas geholfe hod wurde mir ned übermitteld,  
ewwer soin Zimmerkolleesch wurde fast noch als Mörder betittelt,

denn es Bett aus dem er is morjens rausgekroche  
woar so rot als hessde e Sau drin abgestroche.



Un die Musigg speelt unserm Sonnenanbeter:  
Palma de Mallorca.

---

Isch kennd eisch jetzd als weider berischde,  
denn es gid noch die oa orrer oanner Geschischde,

vun em Dachdegger der uff de Woistubb hod es Dach nei gedeggd  
das mer die Woistubb aach vum Flugzeug aus entdeckt

horrer de Noame schee uffs Dach nuff nodiert  
doch dobei issem en Fehler bassierd,

er hod nämlisch un des is ned iwwertriwwe,  
Woistubb uffem Dach falsch ausgeschriwwe.

Un so mussd de Herr Alkoholmann, un des is herd er ned gern,  
es Dach nochemol umgedeggd wern.

Der sellwe Kerl, des is werglisch so bassierd,  
is schlofend an de Thek in de Woistubb vum Barhogger  
abgeschmierd.

Bassierd issem nix, er hod en Engel zum Schutz  
un außerdem de rischdische Uffprallschutz.

Vun zwaa oannern Kerle do aus unserm Ord,  
die woarn am Rosemondach minanner fort.

Beim Mädcher Küsse woarn se in Meenz ziemlich aktiv,  
hoamkumme sinn se beide Corona positiv.

Ewwer des woars jetzd werglisch doann gewese,  
die Kerweredd is vorgelese.

Wenns eisch gefalle hod kennd er jetzd applaudiern  
un mir un moijne Borsche aach mol a Rund Getränke spendiern.

Doch die Kerb is ja noch net vorbei,  
heit owend hachd cool breeze nochemol in die Taste noi.

Dud noch was esse un tringe un minanner schwätze,  
noach zwaa Joahr Pause muss mer des schätze.

Un moje frieh um elf, un des wird klasse  
Fängd de Friehshobbe oh, des derf mer ned verbasse.

En Musikant kimmt aach, do bin isch mer sischer,  
der speelt uff jeden Fall emol „Es gibt nur ein Peter Fischer!“

Als kracher vum Mondach speelt owends noch Pfund,  
ihr kennd mers glaawe, do gehds nochemol rischdisch rund.

Machts gud ihr Leit, bleibt gesund, gligglisch un froh,  
denn die Rämschter Kerb is do!

Kerwemarsch Sascha